

浪穹縣志畧

浪穹縣志畧

浪穹縣志畧卷九

知縣周沆纂輯

人物志

鄉賢

伊古殊尤之質未嘗擇地而生故十步之內必有芳草十室之邑必有忠信苟其潛修力學出為循吏處為純儒坊表有關於名教俎豆必報以馨香志鄉賢明

楊友道洪武間初建學校以徵辟舉授本學訓導三十

餘年振興文教丕變士風嘉靖三十九年題准入祠

〔舊雲南通志〕

何思明字志遠少孤貧力學有節操嘉靖癸卯舉於鄉
為四川儀隴縣知縣陞烏蒙府通判皆有政績解組
歸宦橐蕭條家徒壁立而自視怡然好學不倦正己
接人鄉里式化僉稱為篤行君子云天啟元年題准
入祠〔參舊雲南通志大理府志〕

趙以康字宏字萬厯甲戌進士官戶部主事典試三楚
大司農嚴公知其賢奉委督理邊儲調度有法邊鎮
賴以不聳出為懷慶府知府視國如家視民如子循
聲丕振六年民豎碑建生祠祀之陞貴州按察司副

使謝病歸內周親族外濟鄉閭五尺童子知愛慕焉
卒年五十三御史李東贊曰士以位顯位崇者驕功
以才懋才捷者佻恢恢公量雅著孤標完全名節今
古寥寥德人藏玉輝映山椒天啟元年題准入祠
參明大理孫愈賢趙以康行述舊雲南通志舊志

何邦漸字文槐萬厯間選貢厯官無為州知州時方饑

饑詳請停徵猾胥蠹吏盡屏斥之州漕米叁千捌百
餘石由長江水行三百里解鳳陽既至僦車運二十
里乃抵倉江風阻滯及虧耗需索甚為民害而鳳陽
臨淮二縣故有漕米三千四百餘石彼民亦久苦北

運邦漸請留三縣米充鳳陽倉而以本州之米併於
黃碓河交兌將水脚銀化鳳臨買米三百石以符原
數為惠甚溥未一載調邳州居民攀轅卧轍遮留浹
旬而去抵邳州未逾年告歸樂善好施倡修學宮武
廟邑舊無志邦漸採輯纂修凡征役水患重為民累
者悉請於官而調平之至今士民徵考文獻猶推何
氏云 〔參舊雲南通志師範滇繫滇南文畧舊志〕

何鳳鳴字巢阿思明之孫萬厯乙卯舉人崇禎間任四
川郫縣知縣當舍苜蓿躡後盡心安撫振興文教倡
修學宮表彰揚雄何武舊蹟陞安徽六安州知州值

流寇圍城鳴鳳躬親督率分隊堵禦日夜防守賊不能破民創生祠祀之歸置書萬卷以誘掖後進為己仕著有半留亭稿嵩登集 國初題准入祠 參舊雲南通志舊志

國朝

王芝成字思峻土典史王晉之子始補弟子員晉卒遂襲父職芝成為人好學幼極泛濫經史為詩文立就念所居僻遠無書可讀因廣購羣籍自諸子百家及漢唐以來文集無不蒐輯浪寄人知有實學自芝成始既襲職值大兵征緬沿途設站供給夫馬芝成督

率調度不擾民事亦辦縣境有蒲陀崆河為澗中沙
石所壅暴漲為災芝成請於縣令築壩禦之此患始
息後苦霖雨鳳羽河復決堤北流入寧湖湖不能容
芝成復請於舊河之外別開新河一道以殺水勢俗
謂之新河舊河全廢惟有新河行水至今賴之又以
邑多水患經費宜預籌集議按畝出錢以為補修之
用所著書甚多其鹽法議一篇給事中谷際岐採以
入奏即今所行之法也平時教人以聖賢為法謂聖
賢之道一仁字盡之仁者無不愛而其要在於推己
及人云年九十而卒道光中題准入祠子崧嘉慶乙

未進士官武鄉知縣

〔雲南通志稿〕

卓行

夫不汲汲於富貴不戚戚於貧賤砥行礪節卓然有
以自立雖一鄉之士固已加人一等然不為立傳將
無以闡潛德之幽光為後學所矜式此亦有司之懼
也志卓行

明

何尉文字雄元鳴鳳第五子生而穎悟讀書過目不忘

九歲能詩文尤好讀古書與兄星文輩居寧湖嘗曰

吾生時父夢金花豹入室蓋先作南山霧隱兆矣詠

歌自適與江蛟許鴻普荷輩詩筒往來於蒼山洱海

聞著有浪植稿高年七十三而卒〔雲南通志稿〕

何素珩字尚白蔚文從子也讀書自娛無志進取愛寧

湖之勝於江幹沙洲構小屋居焉自號琵琶漁家往來乘一小舟以琴樽自隨出入煙波中有詩云湖頭草綠雨初收携鶴囊琴自放舟朱絃不入時人調一曲平沙天地秋其高致不減蔚文也〔雲南通志稿〕

國朝

張

造字深以少孤事母以孝聞乾隆戊子科舉於鄉

任鎮雄州學正嘗謂士無經世才其遇命也其不遇分也士有經世才其遇分也其不遇命也至於窮達

一聽諸自然循分盡職雖微員未扶自有當盡之責
故平生惓惓無華耿介自守尤究心於性理大全一
書與多士講求時人莫不欽服年七十七卒於家

〔舊志〕

李 恮字醕庵歲貢生由鶴慶入籍浪穹厚重寡言潛
心經學於兄弟友愛尤篤講學三十餘年誨育有方
從游者多所成就惟楊元豫楊澎等從學最久皆能
恪守其說克自樹立云 〔舊志〕

楊元豫號南峯歲貢生家貧篤學以力事親不辭勞苦
與人交接無慢色聞媒語即改容人咸敬憚之授徒

於塾先後從學者三百餘人因材作育多所造就嘉
慶元年 詔舉孝廉方正衆議以元豫應豫力辭不
赴雖姓名不越里閭而履潔懷清始終不爲人所訾
議卒年六十有九子淳渭潘孫松磐皆紹承儒業其
淵源有自來也〔參雲南通志稿舊志〕

楊

和字太元歲貢生清貧自守氣節端嚴家居授徒

遵歐陽子准字讀經法按日訓課里中子弟凡從游
者皆能成誦經書又以聖賢教人功歸實踐與其泛
涉子史而無得不若熟習五經而有用暮年皓首吟
誦不輟生平不事著作篤信謹守不愧經生云〔舊志〕

施彥品字美超性醅謹淡泊寡言為諸生開戶讀書不聞外事里中子弟咸師事之嘗謂良賈入市不求速售君子讀書不求速效漢以前鋟版未行悉書於簡人多專經而經學粹唐以後鋟版盛行人不專經而經學疎凡所讀經書皆手抄人或笑其迂弗計也故教人先以治經為急多所成就嘉慶戊辰科舉於鄉旋卒壽椿即其子也

〔舊志〕

趙恆昌字中峯持身端謹講學授徒邑中人咸欽敬之於程朱章句體認深醅暮年目翳訓課皆口授執經請業者接踵於門怡然自適高年七十有八

〔舊志〕

李奮雲字蔚廷邑增生性端慤尤嚴義利辨於書無不
窺其底蘊咸豐乙卯六月羅坪山有白氣橫亘山半
狀若行馬數日不散奮雲時主講書院或問之歎曰
金精現於兌宮其兵兆乎越一年亂作人咸服其能
識微知著矣

〔採訪〕

胡盛熾邑貢生家極貧而邃於學清介自持力矯流俗避
選亂幽居不入城市自言其平生得力處在不欺能

忍為能道其實云

〔採訪〕

阿中立咸豐壬子解元志潔行芳學識過人精天文著
有星象考杜逆未踞大理先屢有咎徵知必亂棄家

避之省賊欽其賢思羅致之使人啖以重聘罵曰我輩亦為賊用天下事尚可問耶致之者慙而退年七十餘以客卒
〔採訪〕

廖維鈐字廷玉邑庠生平生力學不圖進取敦孝友好施予於村中倡建文昌宮旁為義塾嘗訓子弟曰為人須篤實作事要光明不可自欺以欺人方為有用學問無字文章境遇不齊要能安之乃能淡人之所不淡而後能不淡人之所淡也因自號淡翁
〔採訪〕

朱奮揚字毅齋歲貢生敦崇實行淹雅多聞授徒四十餘年其貧不能具修脯者輒招致及門勉以共學人